


‘O Lo‘u ‘Āiga



‘Ana Maui Taufe‘ulungaki

‘O Lo‘u ‘Āiga



Lōmia i le 2021 e le Matāgāluega o Ā'oga,
Pusa Meli 1666, Ueligitone 6140, Niu Sila.
www.education.govt.nz

Puipua fa'aletulāfono le lōmiga i le gagana Sāmoa i le suafa o le © Mālō 2021
Puipua fa'aletulāfono ata e le © Mālō 2021

E noanoatia 'uma āiā.
'O fesili e 'ave 'uma 'i le kamupanī na lōmia.

Tautua tau lōmiga: Lift Education E Tū
Fa'atonu: Galumalemana Afeleti L. Hunkin ma Don Long
Tusiata: Liz Tui Morris

ISBN 978 1 77690 009 1 (lolomi)
ISBN 978 1 77690 023 7 ('upega tafā'ilagi)

E mafai ona 'oka kopi e sui ai mai le Ministry of Education Customer Services,
'upega o tafā'ilagi o le www.thechair.co.nz
i le imeli o le: orders@thechair.minedu.govt.nz
po'o le telefoni lē totogia i le 0800 660 662.

Fa'amolemole e tusi mai le nūmera o le tusi lea 90009.

na tūsia e
‘Ana Maui Taufe‘ulungaki

fa'atasi ma

Tootoooleaava Fanaafi Aiono-Le Tagaloa

‘o ata na tūsia e
Samuel Sakaria

Matāgāluega o Ā'oga

“Meleane, ala ‘i luga!” ‘Ou te pupula a‘e, o‘u iloa atu fōlīga popole o lo‘u uso.

“Ua ‘ou fafagua ‘oe ona peisea‘ī sā fai sau fa‘alepō.”

‘Ou te le‘i ala lelei, na iai vāega o la‘u miti ‘olo‘o vili pea pei ‘o se ata tīfaga.

“Malie ‘ua ‘ou fafagua ‘oe! Na ‘ou toe tau‘alaga fo‘i?” ‘o la‘u fesili lea.

Na‘ona lue o le ulu o Tili, ona pula to‘a mai lea ‘iā te a‘u ma fesili, “E te mana‘o e fa‘amatala mai le mea na tupu? ‘O ‘e manatua lau miti?”

Na moe‘i‘ini o‘u mata, ‘ou te le‘i fia iloa atu Tili. ‘Ou te le‘i fia manatua. E lē ‘o se fa‘alepō, ‘a‘o le mea moni, ma ‘o taimi ‘uma e moe‘i‘ini ai o‘u mata, ‘ou te va‘aia le mea na tupu i nai māsina talu ai.



‘Ua toe fa‘asolo la‘u va‘ai ‘i le mā potu ma lo‘u uso o Tili. E tasi le tausaga e matua ai Tili iā te a‘u. ‘O le manatu na o‘o mai ‘iā te a‘u, fēfē ‘ua matuā sui mea ‘uma. Na alu lo‘u tamā Niu Sila o Teti Sione ‘i Toga, ina ‘ua māliliu o‘u mātua Toga, ma fa‘aleagaina lo mātou fale i Niuatoputapu i le galu lolo. ‘O ia na ‘aumaia a‘u ‘i Niu Sila, ma ‘avea ai loa a‘u ma ona afafine, le aupito i la‘itiiti. Na vaetama a‘u e pei ona māsanai ai i le tū ma le aga a Toga ma Sāmoa. Na mālamalama lelei si o‘u tinā Sāmoa, ‘auā na māliliu fo‘i ni isi o lona ‘āiga i se galu lolo. ‘O lea lā ‘ua ‘ou nofo nei i Māngere, ‘Aukilani i Saute.

‘O lo mātou ‘āiga, e su‘ifefilo – ‘o le Toga lo‘u tamā ‘a‘o lo‘u tinā ‘o le Sāmoa. E iai fo‘i isi ‘āiga su‘ifefilo i lo mātou vai‘a‘ai. E pei ‘o le tele o ‘āiga Pasefika, mātou te nonofo fa‘atasi ma ni isi o o mātou ‘āiga. ‘O lo mātou fale e iai ma le tinā o lo‘u tamā, ‘o Meleane Lupe. ‘Ua valu sefulu ma le lua ona tausaga, ma ‘o ia lea ‘ou te igoa ai. E iai fo‘i ma lo‘u tausaga o Galu, ‘olo‘o ā‘oga i le iunivesitē.

‘Ua ‘ou tepa ‘iā Tili ona ‘ou musumusu lea ‘i ai. “‘O ‘e fia iloa mo‘i lava la‘u miti?”

“Sōsō atu,” ‘o le tali lea a Tili. Na ‘ou sōsō fa‘alatalata ‘i le puipui ‘ae ta‘oto mai Tili i o‘u tafatafa, ‘afu lo mā ‘ie‘afu, ona fai mai lea o Tili e fa‘amatala atu ‘iā te ia, le māfua‘aga e fai ai ma ‘ou tagi pe‘ā ‘ou moe. “Pe‘ā iai se aogā mo ‘oe,” ‘o lana toe tulitatao mai lea.




Na moe'i'ini o'u mata. 'O le ūū e pei 'olo'o fa'aola ni uila afi se tele na fafagua a'u i lenā taeao. Na 'ou momo'e ai 'i fafo, i lo'u tei ma lo'u lē mautonu. 'Ua lē iloga se itu 'ou te autilo 'i ai i le tau su'ega o le māfua'aga o le ūū. Pei 'a 'ou oti i lo'u fefe ina 'ua mā fesāga'i ma se va'aiga mata'utia, ma le ūū 'ua matuā gatete ai lo'u tagata 'ātoa. 'Ua fa'amamalu mai le galu e pei 'o se 'olo maualugā lava, sili atu 'i le maualuga o se niu, ma 'ua 'āmata ona mafuli mai i o'u luga. E pei se manu fe'ai le galu, ma 'o le ūū sā 'ou fa'alogoina, 'o le gū o nifo o le manu fe'ai. I lea taeao, sā fāgota lo'u tamā i le ā'au, 'ae ao lau'ie a lo'u tinā, sā tatao e fa'apapa'e i le ava i le vā o le motu o Hunganga ma Niuotoputapu. 'O o'u tuagane mātutua e to'alua 'o Sione, e sefulu lua ona tausaga, ma Palu, e sefulufā, sā nofoā'oga i Tongatapu, 'iā Seini, le uso o lo'u tinā.

'O le pō talu ai, 'a'o mātou 'a'ai, sā mātou talanoa ma o'u mātua i a lā fuafuaga mo le taeao. 'O le mea lenā 'ou te ala a'e ai, e na'o a'u lo'u fale.

Na 'ou tagi fia ola 'i uta, pe ā ma le maila fa'ato'ā 'ou tū, ma fa'apalasi vaivai, 'ua 'ou matuā ga'e i lo'u sela ma lo'u tagiaueuē. 'O le aso lea na 'ou matuā oti ai. 'O le aso fo'i lea na i'u ai le tasi o o'u ōlaga, 'ae 'āmata le isi i nu'u mamao.





'O lo'u igoa 'o Meleane Lupe. E sefulu o'u tausaga. 'Ae le'i tupu lenei fa'alavelave mata'utia, sā mātou nonofo ma o'u mātua, 'o Solo ma Nunia Tongia, i le 'a'ai o le motu o Niuatoputapu. Sā 'ou i le Vasega 6, i le Ā'oga Tulaga Lua a le Mālō i Hihifo. Sā mātou nonofo i lo mātou fale laupapa, e tū lata i le sami. 'O le tele o aso, pe'ā tu'ua le ā'oga, ma 'ua 'uma a'u fe'au māsanī, 'e te maua atu a'u i le matāfaga. 'Ou te fafia 'ou te ta'alo i le matāfaga ma su'e pa'a ma isi mea ola e mau i le matāfaga. E 'ese le mānaia o lo'u ūlaga i Niuatoputapu. 'Ae pagā lea na matuā sua mea 'uma i le galu lolo.

Na fa'alogo toto'a Tili 'a'o fa'amatala lo'u ūlaga i Toga. 'O Tili na fānau ma ola a'e i 'inei i Niu Sila. E tasi lana malaga atu 'i Toga 'ae fa'aluua ona o'o 'i Sāmoa. 'Ae le'i o'o atu lava 'i le motu o lo mātou tamā. 'O se tasi o motu aupito i mamao o Toga.

'Ai na 'i'ite Tili i le loloto o lo'u fa'anoanoa, ui e le'i maligi o'u loimata. Ina 'ua 'uma la'u fa'amatalaga o o'u mātua i Niuatoputapu, e leai sana 'upu, 'ae na'ona 'a'apa mai ma fusi mau a'u. 'Ua taufai maligi o mā loimata. Na mā momoe ai a fa'apēnā – opo e le tasi, le isi.



‘O la mā malaga mai ma lo‘u tamā Niu Sila, o Sione, na mā felelei mai Niuotoputapu ‘i Tongatapu i se tama‘i va‘alele e na‘o le to‘asefulu lana pasese. ‘O lo‘u fa‘ato‘ā ti‘eti‘e lea i se va‘alele, ma sā ‘ou matuā pala‘ai i le pa‘ō o le va‘alele. ‘Ua ‘ou toe manatua ai le ūū o le galu lolo.

Sā ‘u‘u mau e lo‘u tamā lo‘u lima. “Aua ‘e te popole Meleane. Va‘ai fo‘i ‘oe i ao! E ‘ese le mānaia, ‘a ‘ea?” Na ‘ou matamata ‘i ao i lugā ma le sami mamao a ‘i lalō, ona galo ai lea o lo‘u fefe.

E lāpo‘a atu lā le va‘alele na mā felelei ai ‘i ‘Aukilani, ‘ae sā ‘ou fefe lava. Na ‘ou moe i le tele o le malaga. I le ‘āmataga o le faigāmalaga na fai mai lo‘u tamā, “E iai ata komi mānanaia mo tamaiti e mafai ona ‘e matamata ai pe‘ā ‘e mana‘o ‘i ai.” ‘Ae, e lē māsanī ona ‘ou matamata ‘i ni ata komi. E le‘i oso fo‘i so‘u fia ‘ai. Sā tu‘u ‘uma lo‘u mālosi ‘ina ‘ia ‘ou lototele.

‘O lo‘u tinā Sāmoa, ‘o Easter, ma lo‘u uso ‘o Tili na fa‘atalia mā‘ua i le malae va‘alele. ‘O Tili e igoa le igoa o se tuafafine po‘o se uso o mātau o ‘ou mātua i Sāmoa. ‘O lo‘u ‘āiga Niu Sila e tautatala i le gagana Toga, le gagana Sāmoa, ma le ‘Igilisi. E tau mālamalama fo‘i i le gagana Māoli. Na ‘ou te‘i ina ‘ua talanoa mai ‘iā te a‘u lo‘u tinā ma lo‘u uso fou i le gagana Toga. Na fusi a‘u e lo‘u tinā ma fai mai, “‘O a‘u ‘o Easter. E mafai ona ‘e vala‘aua a‘u i lo‘u igoa, po‘o Mami fo‘i, e pule ‘oe. ‘O lou uso lea, ‘o Tili. ‘Ua leva ona fa‘atalitali – fia feiloai ‘iā te ‘oe.”

Na tago mai Tili, ‘u‘u lo‘u lima ma ta‘ita‘i a‘u i le ta‘avale. Fai mai lana tala, “Matuā lē mafai ona ‘ou moe anapō. ‘Ua ‘ou matuā ‘ale‘aleaitua. Na tou feiloai ma o‘u tuagane i Nuku‘alofa? Fai mai Teti e ōmai tama e fai Kerisimasi mai ‘i ‘inei.”

E le‘i sao sa‘u tali ‘ae fai mai Mami Easter, “Tili, va‘ai lelei le mea lenā ‘e te lua ō ‘i ai. ‘Ua ‘ova lou tautala. Tu‘u isi tala sei o‘o ‘i le fale.”

Na ‘ou ‘ata‘ata lēmū a‘u ‘iā a‘u. E mālie mānaia iā te a‘u le tala a Mami.



Fai mai lo'u tamā o Sione – Teti – na 'aumai a'u 'i Niu Sila mo lo'u saogalēmū. Na 'ave ona atali'i 'i Toga 'ina 'ia iloa le gagana, aganu'u, ma amio fa'atoga. 'O lana tala 'iā te a'u, 'ia 'aua ne'i galo 'iā te a'u lo'u 'āiga i Toga, "Ae 'o lo tātou 'āiga lenei. Talosia e maua lou fiafia i 'inei."

Na 'ou fesili 'iā Teti e fa'amatalatala mai mea 'uma e uiga i lo mātou 'āiga.

"E iai ou 'āiga i Toga, Niu Sila, Ausetalia, ma Amerika. Tou te feiloa'i ma isi i le Aso Sā, ma 'a fai le feiloa'iga a lo tātou 'āiga i Los Angeles i le tausaga fou, ona 'e feiloa'i lea 'i le to'atele 'olo'o nonofio i isi itū o le lalolagi. 'O a'u, 'ou te igoa i le tamā o lo'u tamā, 'o Sione."

'A'o o'u nofo i Niuatoputapu, e le'i taitai tau lo'u māfaufau 'i isi itū o le lalolagi. 'A'o lenei 'ua 'ou iloa e matuā to'atele o'u 'āiga mātou te le'i feiloa'i, ma e iai se aso lata mai, mātou te ono feiloa'i ai. 'Ou te lē toe āumatuā.

'O i 'inei i 'Aukilani, mātou te lolotu i taeao o Aso Sā. Pe'a tū'ua lotu ma 'uma to'ana'i, ona mātou asiasi lea i o mātou 'āiga Toga ma o mātou 'āiga Sāmoa. 'O lo'u Aso Sā muamua, sā fai ai le to'ana'i i lo mātou fale ma na ō atu ai ni isi o o mātou 'āiga. E fai a mātou umu e pei ona fai i Aso Sā i Toga ma Sāmoa. E fai le suavai ufi, talo, lu'au māmoe, po'o le povi māsimā fo'i. 'O lo'u Aso Sā muamua, na tao ai pua'a e lua ma na ō atu fo'i o mātou 'āiga ma isi mau tāumafa 'ona 'o lo'u Aso Sā muamua lea i Niu Sila. Na matuā logo i o'u tino le māfanafana o lo lātou alofa mo a'u.



‘Oka se tele o mea fou – i lo‘u aso muamua i le ā‘oga!
Fai ‘o lo‘u popole ‘a‘o lo‘u matamuli. ‘Ae ‘ese le agalelei o le pule ā‘oga,
‘o Mrs Peterson. E māsanī lelei ma Mami Easter.

‘O lo‘u faiā‘oga i le vasega mo gagana e lua – gagana Toga ma le ‘Igilisi,
‘o Mrs Tu‘inukuafe, na fa‘afeiloa‘ia a‘u. “Mālō e lelei, Meleane. ‘O a‘u lou
faiā‘oga mo le Vasega 6. ‘E te mana‘o e vala‘au ‘oe iā Meleane po‘o Lupe?
‘Aua ‘e te popole i lau nanu. Mātou te fesoasoani atu ‘iā te ‘oe, ‘a ‘ea Sepi?”

Na ‘ou fai ‘i ai, fa‘amolemole vala‘au a‘u ‘iā Meleane. Mā te vasega ma
Sepi, e nofo i o‘u tala ane. ‘O ia lea ‘olo‘o fa‘asinoa mai ‘iā te a‘u le mea e fai.
‘O lona tamā le Toga ‘a‘o lona tinā le Sāmoa, pei lava ‘o a‘u.

‘Olo‘o fa‘amasani a‘u e Tili ma Sepi i a lā uō. ‘Ua ‘āmata ona ‘ou
nofogōfie ‘aemaise ‘auā e to‘atele tamaiti Pasefika i le ā‘oga. E iai fo‘i ma
tamaiti Papālagi ma tamaiti Māoli, ‘ātoa ai ma tamaiti mai isi aganu‘u.

E le‘i lelei tele la‘u nanu, ‘auā e fa‘ato‘ā a‘o le ‘Igilisi i Toga pe‘ā o‘o i le
Tausaga 4. ‘Ae ‘o lea ‘ou te fa‘alogo lelei ma mātau tāga ma tala a isi tamaiti
e fai.

‘O le isi aso na ‘ou fai ‘iā Tili, “E ‘ese lo‘u fafia i la tātou ā‘oga. Tele mea
fou e a‘o, tele fo‘i tamaiti e fa‘amāsanī ‘i ai.”

Na‘ona ‘ata o Tili ma fai mai, “E ‘ese lo‘u fafia ‘ua iai so‘u uso ‘ou te
mimita ai!”

‘Ua toe maua le isi o‘u ‘āiga alofa. E tūmau, ma teufatu o‘u mātua Toga,
e o‘o ‘i le fa‘avavau. ‘Ae e ‘ese lo‘u alofa i lo‘u ‘āiga Niu Sila, ‘aemaise lo‘u
uso o Tili lea e fesoasoani mai i la‘u gagana Sāmoa ma la‘u nanu. ‘O se mea
matuā mātagōfie le si‘omia i le alofa.





MINISTRY OF EDUCATION
TE TĀHUHU O TE MĀTAURANGA

education.govt.nz

New Zealand Government

ISBN 978-1-77690-009-1



9 781776 900091